

TE HEHEURAA API

NENEIHIA I ROTO I TE PIHA NENEIRAA A TE EKALESIA A IESU MESIA I TE
FEIA MO'A I TE MAU MAHANA HOPEA NEI.
PAPEETE, TAHITI, I TE MAU AVA'E ATOA.

Te hoo: E 2 farane i te matahiti.

No. 7

Tiurai 1937.

Mat. 31.

PARAU FAAITE

Inaha, oia mau, te na ô maira te Fatu ia outou, no te mau ino e te mau opuaraa o tei tupu e o tei tupu atu â hoi i roto i te aau o te feia parau ino i te mau mahana hopea ra, ua faaara vau ia outou, e e faaara atu â hoi, mai te horoa' tu i teie nei parau no te paari na roto i te heheuraa.—E mai te mea ia inu te hoê taata, no roto ia outou na, te uaina e te mau ava taero, inaha, e ere ia i te mea tia, e ere atoa i te mea au i mua i te aro o to outou ra Metua, maori râ ia haaputu outou ia outou iho no te haapaoraa i ta outou mau oroa i mua ia'na. E, inaha, ei uaina te reira e tia'i: oia ia, ei uaina anoi ore hia no nia i te vine, e o tei hamanihia e outou iho.

E teie â hoi, e ere te mau inuraa taero i to te opu, no te faahopuraa râ i to outou mau tino. E teie â hoi, e ere te avaava i to te tino, e ere atoa hoi i to te opu, e ere atoa hoi i te mea maitai na te taata, ei raau rii râ no te mau pepe e no te puaatoro tei pohe i te ma'i, ia au ra hoi te raveraa, ma te ite e te paari. E teie â hoi, e ere te mau inuraa ve'ave'a i ta te tino e no te opu.

E te mau feia mo'a atoa o te haamana'o e o te haapao mai te rave i teie nei mau parau, mai te pee e te haapaoraa i te mau faaueraa, e maitai te noaa i to raton ra mau pito, e e puohia to ratou mau ivi. E iteahia hoi ia ratou te paari e te vairaa rahi no te ite, oia hoi, te paari i hunahia ra.

E horo hoi e e ore e rohirohi, e haere hoi e e ore e fiu. E te faaite atu nei au, te Fatu, ia ratou i te parau e, e fariu ê atu te melahi taparahi ia ratou mai ia'na i na reira i te tamarii a Iseraela ra, mai te taparahi ore ia ratou. BUKA FAFU 89: 4,5,6,7,8,9,18,19,20,21.

E tâhitohito tei te uaina; e hauti rahi tei te ava taero, e ere te taata paari tei vare i te reira. MASELI 20: 1.

Eiaha ei taata inu hua i te uaina, eiaha ei taata momoto, eiaha ei popore tao'a i te mea tia ore ra, ei taata mârû râ, eiaha ei taata marôrô ra, eiaha ei nounou moni. I TIMOTEO 3:3,

E Faautuahia te Taata Mai te Au i Ta'na Ohipa.

E faaroo na tatou i te faaotiraa o taua mau parau nei: o te Atua te mata'u atu, e haapao hoi i ta'na parau; o ta te taata atoa ia e ati noa'e; E hopoi atoa te Atua i te mau parau atoa i te haavaraa, e te mau mea mo'e atoa ra, te maitai e te ino atoa ra. *Kohele'a 12;13-14.*

¶ E vai nei te tahi pae o tatou tei hape to ratou mau mana'o no nia i te hararaa e te tatarahaparaa. E rave rahi te taata tei mana'o e, e ere te peapea ia tapeahia te ohipa, e i muri a'e i te raveraa i te hara te mana'o nei vetahi: *Inaha, tei rapae vau i te ohipa i teie nei, eaha ia te peapea ia rave faarahi au i te ino.*

I na mahana i mairi a'enei, i roto i te hoê Amaa o te Missioni, ua haere te hoê taeae e farerei i na Orometua ma te parau atu e, te faaho'i atu nei au i ta'u mau ohipa, no te mea e haamata oia i te rave i te hara. Ua mana'o oia e, e faaite oia i te reira i te Orometua a rave atu ai i te hara mai te au i to'na iho hinaaro, e ia tatarahapa oia ua maitai faahou te ohipa mai te huru matamua ra. Aue to'na hape e! Mai te mea te haapii nei te Ekalesia i te reira, hoê â ia huru e, ua faatia tatou te tatarahaparaa i te taime poheraa.

Ua faatiahia a'enei te parau o te hoê Metua tane tei hinaaro i te faaite, i ta'na tamaiti haapao ore, te maamaa o ta'na mau ohipa, no reira oia i tanu ai i te hoê pou i pihai iho i to'na fare. Na ô atura oia: *E tau tamaiti, i te mau taime atoa e rave ai oe i te hoê ohipa ino, e patiti vau i te hoê naero i roto i teie pou, ia rave ra oe i te hoê ohipa maitai e iriti ia vau i te hoê naero i rapae, mai te mea te vai ra te hoê naero.* Ua tamau noa te tamaiti i te raveraa i te hara, e ua tamau noa te metua tane i te patitiraa i te naero. Tae a'era i

i te hoê mahana, hi'o atura te tamaiti i taua pou e ite atura oia e, ua fatata roa te reira i te api i te naero e na te reira i faatupu i te feruriraa i roto ia'na. Ite oioi atura oia i to'na hape, tatarahapa ihora oia e haamata'tura i te ora i te hoê oraraa maitai e te tauturu hoi. I te tahi tau i muri rii iho, ua aratai atura te metua tane i te tamaiti i roto i te aua.

Na ô atura oia ma te faaite i te pou: *A hio na, aita te hoê naero e toe nei i roto i te pou.* Noa'tura i te reira aita to te tamaiti e hi'oraa oaoa maitai. Na ô atura te metua tane: *Eaha te peapea, e tau tamaiti, ua iritihia te mau naero atoa.* Pahono atura te tamaiti: *E, ua mahiti te mau naero atoa ra, area ra, te mau apoo ra, te vai noa ra ia.*

O te huru mau ia o to tatou oraraa; i te mau taime e rave ai tatou i te hoê hara ua tapaohia tatou i te hoê tafetafeta, e a ore ra, te hoê apoo apî, te ore roa e mâ maitai ia tatou iho, noa'tu i te huru o to tatou oraraa maitai i muri iho. Ia hara te hoê taata eiaha oia e mana'o e, eita ta'na utu'a e rahi atu ia hara faahou oia, no te mea, ia hara i na taime e piti, ua ta tai piti ia te ino i te hara hoê roa ra, e e haavahia tatou mai te au i ta tatou mau ohipa.

I te tahi na mahana i mairi a'enei ua parau te hoê taata faatere no te hoê Amaa, no teie nei Misioni, i teie nei mau parau: *E mea tia ia tuu tatou i te mau taure'are'a ia haere e ia haapao i to ratou hinaaro, te vai ra te mahana e ite ai ratou i to ratou hape e e ora'i ratou i te oraraa maitai.* E rave rahi to tatou tei au to ratou mana'o i te reira, area ra, E mana'o hape roa ia. E ere i te mea tia e te mea maitai ia inu to tatou mau feia apî i te ava, ia puhipuhi i te avaava e ia rave i te tahi atu â mau hara, e mea tia ra ia tauturu tatou ia ratou e ia rave i te mau mea atoa no te tapearaa ia ratou i nia i te e'a afaro e te apiapi hoi.

A faaau na tatou i to tatou oraraa i te hoê moana rahi, e

a mana'o ana'e tatou e, tei nia iho tatou atoa i taua moana ra, na nia i te poti ta ie, no te haere raa i to tatou mau parahiraa i nia i te ra'i. Area, e poti taa ê to te tahi i to te tahi, no te mea eita e tia ia oe ia afai ia'u i te ra'i, e eita e tia ia'u ia afai ia oe — e tae tatou i reira na roto i ta tatou iho mau ohipa.

E haamata tatou i to tatou tere i te taime e naeahia'i ia tatou te matahiti e ite ai te maitai e te ino. E tamau noa te matai tano, e ia maoro to tatou oraraaa i te oraraa maitai—te huru oraraa ta Iesu hinaaro nei no tatou—tei nia ia to tatou mau ie e to tatou rima ra tei nia ia i te hoe faatere, e te tere puai ra tatou i te tereraa tia. Area ia hara tatou e a ore ra, ia faaea tatou i te tauturu, e topa to tatou mau ie e e haamata tatou i te painu. Ia rahi to tatou raveraa i te hara ua rahi atoa ia to tatou painuraa e te atea ê raa i te e'a mau.

Na roto i te tatarahaparaa e faatae faahou tatou i to tatou mau ie i nia e e hoi atu i nia i te e'a tia, area ra, e mea ohie ia feruri e, eita tatou e tae atu i te vahi te taeahia ahiri tatou i tere atu ma te puai e te afaro i te mau taime atoa.

E tia ia painu tatou nau mahana rii e a ore ra hoê ava'e, mai te mea hoê noa iho to tatou hararaa, area ia ta taipiti tatou i te hararaa e tapiti atoa ia to taton painuraa, e mai te mea e tamau noa tatou i te na reira e atea ê roa ia tatou i te e'a afaro e te apiapi e tae noa'tu i te taime e tauihia to tatou mau hinaaro, e faaetaetahia to tatou mau aau, e faahuru ê hia to tatou mau mana'o e e tamau noa tatou i te raveraa i te hara e te painu i te taatoaraa o to tatou oraraa.

E tia ia taton ia ite i te hape o taua mau taata tei mana'o e, e tia noa ia ratou ia rave i te hara, mai te au i to ratou iho hinaaro, ia tatarahapa, e e tae iho â ratou i te parahiraa teitei i roto i te basileia o te Atua ra. Eita roa'tu te reira e

tia, e te feia tei mana'o i taua mana'o ra, e hope ratou i te oto e te peapea ia farii ratou i te haavaraa a te Atua.

No reira a faaitoito ana'e tatou i te faaiteraa e, te here nei tatou i te Atua, na roto i to tatou tapearaa ia tatou iho i roto i te mâ e te viivii ore i te hara. Ua parau mai Oia, Mai te mea te here ra outou Ia'u, e haapao ia outou i Ta'u mau faaueraa.

Papaiahia e Totoru Orome'ua.

TE AAMU NO TE AVAAVA

*A*ITA'TU e taata i ite i te avaava, maori râ, o Avaava iho, no reira e farerei ana'e tatou ia Avaava, e na'na e faaite mai, ia tatou, to'na huru mau.

O Avaava teie e parau nei:

E tumu raau iti au tei tupu noa i te mau vahi repo maitai. Tei roto ia'u te hoê taero ino roa tei parauhia e Nicotine. Ua itehia teie, e te te mau taote, e te mau taata atoa tei pūhipuhi noa ia'u, i roto i to ratou tino. Ia na reira raton e horoa'tu vau ia ratou i te puai haavare. Ratou tei rave tamau noa ia'u, na mana'o ratou e, o vau te puai huna e te maramarama hoi.

Ua ite anei outou ia ratou tei rave noa ia'u ? Te rave nei ratou ia'u ma te mana'o ore, noa'tu te hora e a ore ra te vahi, e ere anei teie te parau mau ? O vau to ratou paari, na'u e faatere i to ratou tino e to ratou aau, e tavini mau ratou no'u.

Ia vaiiho maoro rii ratou ia'u, ua riri roa vau, no reira vau e haaparuparu ai ia ratou, e ia rave faahou ratou ia'u, na'u

e horoa'tu ia ratou i te puai haavare; te reira ia ta'u ravea ia faariro ia ratou ei tavini no'u.

Ia tamata te taata ia'u, ua ite papu vau e, e roohia ratou i to'u zugo. Ua ite anei outou i te taata tei tamata i te tata-ra i to'u tapearaa, e a ore râ, ia faarue roa ia'u? Ua ite atoa outou e, e mea varavara roa ratou tei tata-ra i to'u tapearaa, hoê â ratou i te rao tei mau i roto i te upea tutura-honui. Ua ite atoa outou e, aita e nehenehe ia ratou ia faa-oromoi huru maoro rii no te mea e tupuhia ratou i te paruparu, eita ra e maoro e rave faahou ratou ia'u, o vau to ratou fatu.

E o ratou tei tamata i te faarue ia'u, ua ite ratou e, ua haavarehia ratou e au, e ua ite atoahia, e ratou, to'u maramama e to'u puai, e mea haavare roa ia.

O vau te tumu i farerei ai ratou i te ati e te ma'i hoi e e moni rahi roa tei faaruehia no'u.

Ua tapao atoahia ratou tei rave noa ia'u, e eita e tia ia ratou ia huna i te reira, no te mea ua itehia ratou, e to te ao atoa nei, no to ratou mau tapao, oia hoi, to ratou manimani rima tei re'are'ahia, to ratou aho e to ratou tei paruparu roa ia. Eita e maoro ua ite ratou e, na'u i eia i to ratou aho, to ratou puai e to ratou itoito hoi. Teie ia ta'u ohipa no te faarahi i ta'u mau tavini, e faahema vau i te taata nei ma te parau nehenehe, te haapaia e te tapao haavare. No reira e faamu vau ia ratou i te ainu monamona haavare, e ia tamata te taaata ia'u, e tapeahia ia ratou i roto i ta'u herepata.

Ua itoito roa van i ta'u ohipa nei, no te mea tau fatu, o te diablo ia, e te faahema noa nei au i te taata paari e te tamarii tamaroa e te tamahine hoi, e to'u hinaaro, ia faariro i te taata, i to'na apîraa, ei tavini no'u, e ia roahia, e mea ohie roa ta'u ohipa, no te mea na to'u mau tavini e rave i ta'u ohipa, e aita ta'u e ohipa faahou, maori râ ia parahi noa

vau i nia iho i to'u terono a ata noa'i i ta'u mau tavini no to ratou pouri.

No reira, outou e to te ao nei, te mau tamarii tamaroa e te tamahine hoi, a haapao maitai, a haere outou na te e'a maramarama ia ore outou ia mau i roto i ta'u herepata rahi, no te mea ia haafatata mai outou ia'u e haruhia ia e au.

E te parie nei au i te taata, noa'tu to'na huru, mai te mea e tamata oia ia'u, e roohia oia e e mauhia hoi oia i roto i to'u tapearaa viivii ra.

Ua faaroo a'enei outou i te mau parau na te enemī, o *Avava*, e teie nei a faaroo maite outou i te mau parau fafau e te mau haamaitairaa te fariihia e ratou tei haapao maitai i te parau paari tei heheuhia mai e te Atua.

E teie â hoi, e ere te avaava i to te tino, e ere atoa hoi i to te opu, e ere atoa hoi i te mea maitai na te taata, ei raau rii ra no te mau pepe e na te puaâtoro i pohe ma'i hoi, ia au râ te rave-raa hia mai te ite e te paari. E teie â hoi, e ere te mau inuraa ve'ave'a i to te tino e to te opu. - - E te mau feia mo'a atoa o tei haamana'o e o te haapao mai te rave i teie mau parau, mai te pee e te haapaoraa i te mau faaueraa, e maitai te noaa i to ratou ra mau pito, e e puohia to ratou ra mau ivi. E itehia hoi ia ratou te paari e te vairaa rahi o te ite, oia hoi, te paari i hunahia ra. E horo hoi e e ore e rohirohi, e haere hoi e e ore e fiu. E te faaite atu nei au, o te Fatu, ia ratou i te parau e, e fariu e atu te melahi taparahi ia ratou, mai ia'na i na reira i te tamarii a Iseraela ra, mai te taparahi ore ia ratou. Amene.
Buka Fafau 89: 8-9, 18-21-

Papathia e Goladana Make, Orometua,



EDITORIALE

THOMAS L. WOODBURY.

E Parau no te Puhipuhiraa Avaava
E no te Inuraa i te Ava.

TE inuraa i te ava e te puhipuhiraa i te avaava, o na peu ino ia e piti no te taata nei, e tei hau roa'tu i te ino, no te tamarii apî. Te mau taure'are'a tane e te mau taure'are'a vahine tei titau i te rê, i roto i te mau tatauraa, e haapae ratou i teie nau mea e piti.

E noa'tu â i te reira, e na peu faufau e te hairiiri.

E ino rahi ta te avaava e faaatupu i nia i te mau uaua e e faaino oia i te tahi mau tufaa o te roro, e e oioi roa te reira ino te tupu i nia i te tamarii. Eiaha mai te tahi mau raau taero, te ore noa to ratou taero, eita to'na taero e ore e aita e ravea e vai nei no te faatereraa ia'na. I roto i te hoê rata ta Thomas A. Edison i papai atu ia Henry Ford, te na ô ra oia: *Aita roa vau e rave nei i te taata puhipuhi avaava ei taata rave ohipa.* E hoê â te mana'o o Henry Ford i taua vahi ra, eita roa oia e faatia te puhipuhi avaava e te inuraa ava i roto e i pihaiho i te hanere o ta'na mau fare raveraa ohipa. O te taata o tei itehia i te raveraa i te hoê o taua na peu ra, e tihati hia ia oia no te ohiparaa.

E mea papu maitai e te tano hoi na irava hopea e maha tei neneihia i nia i te apî matamua o teie nei ve'a, no reira a tai'o faahou i te reira.

No reira e faaoti au i teie nei parau ma teie mana'o:

Na ô atura te mohina ava i te avaava,
 Te hinaaro nei au i te parie ia oe e

E rahi a'e te taata te pohe ia'u ia oe na,
 Noa'tu e ere i te mea iti te taata te pohe nei ia oe.
 Na ô atura te avaava i te mohina ava,
 E mea ohie roa te reira ia'u nei i to'u mona'oraa,
 No te mea na'u e turai nei i te tamarii ia haere i raro,
 E i reira oe e haru mai ai ia ratou e e haapao i ta oe tufaa.
 Te haere nei ratou ia oe ma te puha pape maha ore
 Area ra o vau te matamehai tei ite ia ratou;
 No reira, te rahiraa o ratou, ia tai'ohia ia na'u:
 E faatia vau ia parie, no te mea e ohipa ohie te reira ia'u.
 Parau atura te mohina ava:
 Aita â vau i hi'o noa'tu i taua ohipa ra mai te reira te huru;
 E mea tia ia'u ia faî e, e parau mau ta oe i parau iho nei,
 Na oe ihoa e haru nei i te taure'are'a maamaa,
 E faai oe i to'na tino i te au auahi taero,
 E na'u e faairi ia'na ei taata inu ava numera hoê,
 Ua hoê roa ta taua ohipa e tae noa'tu i te hopea
 I ore ai e tia ia taua ia tamai.
 No reira te mohina ava e te avaava
 I aroha'i te tahi i te tahi e i faa ore ai i ta raua parie.
 E haere atura raua apipiti
 Ma te imi haere i te tusia na raua i te vahi atea ra;
 I te mau otia o te nunaa nei
 Ua tahoê raua i roto i te hara e te faainoraa i te taata.
 No reira, tera mai ta matou faaara, ma te papu,
 A avau atu ia raua, mai ia outou i avau i te Diabolo.

TE PARAU AUTAHU'ARAA.

TIHOTI M, Lake
 BENIAMINA Winkel
 LEVI Leatham
 ELEDONA Mortensen

Te Tufaa Ahuru.

Maseli 3:9: Levitiko 27:30-32: Genese 14:18-20: 28:22.

Te mau haamaitairaa i tohuhia ra:

No ratou te mau faufaa no te mure ore. B. F. 78:18

E o tei farii i te mau mea utoa ma te oaou, e rahi atu ia to'na hanahana: e amui atoahia i nia ia'na te mau mea atoa no te fenua nei, oia mau, ia hanere noa'tu terahiraa, e ia hau noa'tu. B. F. 78:19.

E mai te au i to ratou haapaoraa e haamaitai Au e e faarahi Au i te haamaitairaa, i nia ia ratou, e i nia i to ratou ra mau huaai, i muri a'e ia ratou. B. F. 104:33.

E ere te Tufaa Ahuru i te hoê utu'a; e horoaraa râ tei reira tei faaite i te hinaaro mau ia haapao i te mau faaueraa a te Atua.

Te vai ra te hoê ture, tei faatiahia i te ra'i, e i nia i te reira ture i haamauhia'i te mau haamaitairaa atoa. E ia farii tatou i te haamaitairaa, no ô mai i te Atua ra, e mea na roto ia i te haapaoraa i taua ture ra tei haamauhia te mau haamaitairau atoa. B. F. 130:20, 21; Maseli 3:7-13.

Te vai ra te tau e tuuhia mai ai te hoê ture apî e ia haapaohia te reira e te mau taata paatoa. III Nephi 1;3-19:26:19

Na Te Mau Maapii

Mahaere na te mau utuafare,

4. *Te faaroo nei matou e, o taua mau faauerau ra: te matamua ra, o te faaroo ia i to tatou Fatu o Iesu Mesia. Hebera 11:1; I Ioane 1:13; Roma 1:16, 17; Iakoba 2:14-26.*

E faatupu te taata i te faaroo papu, te parau matamua ia o te Evanelia. E faatupu i te faaroo o te mau taata atoa ia tia-turi ratou i te Atua ra.

E mau puai i te *Faaroo* i roto i te tahi rima, e te *Ohipa maitai* i te tahi, e e hahaere na te mau utuafare ma teie nei mau parau o te hau i te maitai.

TE SOTAIETE VAHINE TAUTURU.

MAUDE WOODBURY.
NOROTA HARDY,
TOTARE GREEN.
JOSEPHA G. STEVENS

Haapiiraa no te Ava'e ATETE.

MAHANA MAHA MATAMUA.

Te mau Semeio a Iesu Mesia. Mataio 17:14-21; Luka 7:1-20; Ioane 2:1-11. E te iritiraa mana'o.

MAHANA MAHA PITI,

Ia haere te mau tuahine i te utuafare e ia haapii ratou i te parau no te tavini aroha ore. Mataio 18:23-35.

E haapii te mau tuahine i te ravea ia mâ maitai te ahu; te tumu no te puaraa i te ahu: mai te ahu taata, oia atoa te tino taata nei. Eiaha e haamoe i taua haapiiraa ra.

MAHANA MAHA TORU.

Haapiiraa: Buka a Moromona. TE MOEMOEa a LEHI. I Nephi pene8.
Te moemoea o te taata nei, e faufaa anei ia ?

MAHANA MAHA HOPEA.

A hi'o i te apï matamua o teie nei ve'a, oia hoi, te mau parau no roto mai i te Buka Fafau, i te pene e 89,

Eaha te ravea ia haapae te taata nei i te avaava e te ava ? Nafea i te haapiiraa'tu i ta tatou mau tamarii ? E ohipa ino anei te inuraa i te ava e te puhIpuhiraa i te avaava ?

HAAPIIRAA SABATI.

Goladena W. MACK.
Teneta A. WILDE.
Anderea N. MACHEN.

No te Ava'e ATETE.

Na te Pupu 3 e te Pupu 4.

Irava tamau aau, ALAMA 24:27.

Sabati matamua: Mosia pene 9. Ua noaa ia Zenifa ma te fenua Lehi-Nephi.

Sabati piti: Mosia pene 10. Te ohipa o te Ati Lamana.

Sabati toru: Mosia pene 11. Te Arii ino ra o NOA.

Sabati maha: Mosia pene 12. Te peropheta ra o Abinadi.

Na te Pupu Piti.

Te mau irava i neneihia i te api matamua o teie nei Ve'a, Buka Fafau i te pene 89, e te Editoriale i papaihia e Toma.

Te Paraimere.

Irava tamau aau; I Korinetia 13:13.

1. Te Mesia e te taata api tao'a rahi. Mareko 10:17-31.
2. Maria raua o Mareta. Luka 10:38-41.
3. Iesu e te mau Lepera. Luka 17:11-19.
4. To Iesu aroha i te tamarii rii. Mareko 10:13-17.

HAAPIIRAA NA TE FEIA API.

TENA PALMER.

NOELA. C. DEVEY.

VERANONA C. THURGOOD.

HAURATA HEUSSER.

HAAPIIRAA NO TE AVA'E ATETE.

Te mau himene e te Haapiiraa hoho'a. Ia haapii papuhia te reira e ia faaitchia hoi te reira, i mua i te aro o te mau taata, ia tae te tau au ra.

TE HAAPIIRAA HOHOA.

TE MAU PAHI TERE TANO MAITAI.

Te mau tufaa:

O Lehi e ta'na Vahine; Lamana e ta'na Vahine; Nephi e ta-

na Vahine: Lemuela e ta'na Vahine; Zorama e ta'na Vahine; Hagota; Pomare; Na Mataro pahi e ono e te Taata tai'o parau.

Omuaraa parau: E faaite mai te Taata tai'o parau i te mau parau atoa no teie haapiiraa hoho'a, mai te haamataraa e tae noa'tu i te hopea.

E himene te taata paatoa i te himene e *Pahi Ora*.

E pahi ora, Pahi maitai, Pahi puai, tei tere noa na. Mauruuru tatou nei, Tatou nei, tatou nei, Mauruuru tatou nei no te tere i te ao. Tere i te ao, tere e ora'i. Mauruuru tatou nei, tatou nei, tatou nei, Mauruuru tatou nei, no te tere e ora'i. Tune: "Good night Ladies."

TUFAA MATAMUA.

I Nephi pene 17 e te 18.

Tei reira te mau taata, te paraparau ra te tahi i te tahi, i te hoê vahi i te medebara. I reira i tae mai ai, ia Nephi, te faaueraa ia hamani i te pahi ei ravea, na ratou, ia tae atu i te fenua i maitihia ra. To ratou faaineineraa e to Zorama faaiteraa i te parau no Noa ma e to ratou pahi, e *Ohipa faa-ora ia*. To Lamana fariiraa i te parau a Zorama e te parauraa e *Ohipa faaora teie tere*.

Te haamataraa o te tere; Te mau peapea i faatupuhia e Lamana raua o Lemuela i nia i te pahi e to ratou faaoreraa-hia. Te oaoa rahi tei tupu i to ratou hi'oraa i te fenua api e to ratou haereraa i uta i nia i te fenua America.

Himeneraa *Tau Fetii tei nia i te Moana:*

Tau fetii tei nia i te moana. Tau fetii tei nia i te tai. Tau fetii te aroha ia'u, E ho'i mai ratou ia'u nei. Ho'i mai, ho'i mai, e ho'i mai ratou ia ia'u nei. Ho'i mai, ho'i mai, e ho'i mai tau hui fetii. Tune: My Bonnie is over the Ocean."

Paruru.

E himene te Amuiraa i te himene *Aroha, aroha*.

TUFAA PITI.

Alama 63: 5, 6, 7, 8. Ia tai'o te mau taata i teie nei parau.
E 54 matihiti hou te Mesi, Te 37 o te m. no te Tau o te mau Haava.

O Hagota te haamata i te paraparauraa e na te mau taata

atoa e pahono ia'na, e te io'a o te pahi ra o Evanelia ia. E faaite oia i te huru o te pahi e te mau maa i nia iho ra, oia hoi te pape haari e te u'a ei pape ia, e te inai ra e i'a maro ia. Te mau pureraa pahi te haapaohia e te nehenehe o te mau mataro pahi.

E faaite o Hagota i te mau parau no te paturaa o te Oire e te Pare o Babela, ia tae te upoo o te taata i nia i te ra'i. Te haapeapearaa hia to ratou reo e te Atua. *Genese 11:1-10*. I taua tau ra, aratai atura te Atua ia Iareda ma e to'na taeae, i te fenua ê ã, na nia i te pahi; e e vau pahi tei tere atu. Ua tano to ratou tere e ua tae ratou i te fenua America, e *Ohipa Faaora ia*.

Himene: *Tero, Tero.*

Tero, tero, e pahi apî mai, no te fenua Initia te vahi atea. Hi'o, hi'o, vitiviti mau, e pahi ma te ie auro, e te mau mataro. Tune: Sailing, sailing

Paruru,

E himene te Amuiraa i te himene: *E to matou taeae here.*

TUFAA TORU.

I Tahiti i te Tau no te hui Tupuna.

O Pomare tei tae mai, e taata apî e te nehenehe hoi. Ua maere te mau taata ia'na e ua mauruuru atoa hoi, e ua aroha te mau mataro ia'na e e taata vitiviti mau oia.

E ui te mau taata ia'na: Nofea mai oe? Eaha te huru o te taata i to oe fenua? Te huru o te fenua? Te rahiraa o te taata i reira? Te mau parau i haapiihia e ratou? E mauruuru te mau taata Tahiti i ta'na mau pahonora e e faaite atoa mai oia i te parau no Christoforo Colomabuso e ta'na nau pahi e toru, e te maramarama tei tae mai ia'na.

Aita e faito to te mauruuru o taua mau taata Tahiti ra, no reira ua maiti ratou ia Pomare ei Arii fenua no ratou, e

ma te parau hopea, e mau *Tere faaora*, e mau *Ohipa faaora* e e *Arii faaora*.

Mai te mau pahi i paruru e e faaora i te taata i te tau pea-pea, e na reira te Atua, ia tatou nei, ia faaroo e ia haapao tatou i Ta'na mau faaueraa.

No te faaotiraa e himene i te himene: *E faaoti tatou nei*.

E faaoti tatou nei, i to tatou pure, teie hora. To matou Atua, paruru mai na oe, to matou haerea ia tae te ao. Maururu matou nei, no to tautururaa i noaa mai. Aratai oe matou, haapii atoa ra, e tae noa'tu i te hopea. Amene, amene, amene. Tune: AMERICA

PARURU.

TE PRAIMERE

Robeta M. JOHNSON.

Henere C. TEEPLES.

Rarefa R. TAYLOR.

Pereti B. ASAY.

HAAPIIRAA NO TE AVA'E ATETE.

TE PARAU NO TE PRAIMERE.

E haapaohia teie nei ohipa, i te mau Amaa atoa, i te mau mahana maha, i te hora 9 i te po'ipo'i.

E haapii i te mau parau i papaihia i roto i te Buka Fafau pene 89, tei nenehia i roto i teie nei ve'a, e te parau Editoriale atoa hoi.

E mea au maitai, na te Praimere, te himene N° 17, e te himene apî ra o *Aroha*, *aroha*, *Te mau ruau*, *te mau apî*. *Mahana maitai o teie nei*, *E farerei faahou te tamarii*, *Ia arearea tatou nei*, *Ia'orana*. (Tune: Three Blind Mice.)

E ta pŭpŭ i te mau tamarii a haamata'i te himene, na te pŭpŭ hoê e tae noa'tu i te pŭpŭ hopea; e mea vitiviti mau teie himene no te tamarii o te Praimere. E haapii atoa i te tahi ohipa arearea.

TE MAU PARAU API

I te ava'e no Titema i mairi a'enei ua moe te hoê pahi reva rahi. e 7 taa-ta i nia iho, a tere ai oia i te oirê ra i Roto Miti, e ua faaitchia e, e horoa-hia 1.000 tara no te taata te ite i taua pahi reva ra.

E pae ava'e i muri iho ua itehia taua pahi reva ra, e na taure'are'a e piti, tei nia i te tupuai mou'a ra o Alpine, i Utaha, e 35 maile te pae i apatoa i Roto Miti. No te rahi o te hiona i te reira tau aita i haerehia e hi'o e ua vaiihohia te reira ohipa no te hopea o Tiunu. Ia tae i taua mau mahana ra ua faataahia e piti pūpū taata e ua haere ratou i nia i te mou'a, e ia fata-ta ratou i te tae i nia i te tupuai mou'a ua faaroo ratou i te hoê haruru ra-hi, oia hoi ua tupu te hoê horo rahi hiona e te ofai, e rave rahi te tauatini o te tane, e ua tapoi roahia te vahi te reira te pahi reva: riro atura te reira ei tanuraa no te mau taata tei pohe i roto ra, maori ra te vahine a John Wolfe tei itehia e te mau taata iimi.

I te tufaa fenua Colorado, America, ua tupu te hoê ati rahi mau, oia hoi ua tae mai te nānā vivi i nia i te fenua e te mana'ohia nei e, e pau te mau faaapu atoa ia ratou. Ia maue ratou na roto i te reya e poirihia te mahana e ua peapea roa te mau taata ia hi'o ratou i ta ratou faaapu i te amuraahia e te mau vivi.

I te 3 no Tiurai nei, ua moe te vahine faatere pahi reva ra o Amelia EARHART, i tua i te mona: ua faarue oia i te fenua Vaihi no te haere atu i te tahi fenua e i to'na taeraa i tua, e 250 maile, ua pau ta'na mori e ua topa oia i roto i te miti. Te tiaturihia nei e e ora noa oia e tae noa'tu i to'na iteraahia e te mau pahi tei tonohia no te imi ia'na.

Ua tupuhia te Orometua ra o Totare i te hoê ma'i e tei Papeete nei oia i teie mau mahana nei. Ua haamata to'na ma'i i Manihi e ua afai ruhia mai oia i Papeete ia raauhia oia e te taote, e i teie nei tei nia oia i te e'ao te ora. I to'na tupuraahia i te ma'i, i te fenua ra i Manihi, ua tauturu maitai te mau taata no taua fenua ra ia'na, e ua tupu to matou mauruuru rahi ia ratou atoa.

Louis Drollet Gérant

Thomas L. Woodbury Imprimeur.

Rue Dumont d'Urville, Orovini, Papeete, Tahiti.